


11
Kerweborsch



um

Hess. Hof

Kerwespruch

Kerwespruch 1985

In jedem Jahr zur Quetschekuchezeit,
stehn mer Kerweborsch zum Kerwedonz bereit,
do geht's rund im` Monfred soine Hit,
denn uff die Kerb do soin mer immer fit,
mer Kerweborsch losse donn die Wutz eraus,
un lewe on de Kerb in Saus un Braus,
dodefehr des waas de Kenner,
soin mer genau die richt`sche Männer,
zünftisch feiern mer ess größte aller Feste,
beim Donze soin mer gonz klar die Beste,
jeder kennt uns, ob jung ob alt,
alle Mädcher soin in uns verknallt,
weil mer, des liegt doch uff de Hond,
die Scheenste soin im Gerer Lond,
mer haache kräfdisch uff de Butz,
un mache heit fer eich die Wutz,
aach de Monfred ess vum letzte Jahr gesund,
drum geht's heit owend kräfdisch rund,
do dunn mer Kerweborsch schunn soi je,
daß gefeiert werd bis iwwer moi je,
dodefehr soin mer Kerweborsch jo schließlich do,
woann alles singt : " DIE WOFELLER KERB ESS DO "

Noachdem die Musik jetzt fer uns gespeelt,
werd noch korz die Stimm`geelt,
ich drink erstmol on moim Gläsje Woi,
los Frostschutz Frostschutz soi,
donn leg` ich los mit moim Bericht,
den mer spezjell fer eich gedicht.

Zuerst will ich eich bewaise,
daß aa Kerweborsch moal Bolze reiße,
ich honn`s vun oam, der woan`s brennt,
als erster on`s Spritzeheisje rennt,
weil`er als Erster donn,
im Spritzeaudo vorne sitze kann,
meist kimmt`er awwer deletzt,
do ess soi Plätzje schunn besetzt,
deshalb es`em do de Oifall kumme:
" Es nächsde Moal werd`s Audo mitgenumme ",
do wär`er, des wär doch grell,
als Erster donn on Ort un Stell,
im Juni donn, s`war noch in de Schpaschelzeit,
war`s halt wirrer moal soweit,
uff de Chaussee hot e Audo oafange se`brenne,
un unser Feierwehr muß renne,
aach de Reiner, bekohnt als dienstbeflisse,
hot sich do beeile misse,

in soi Audo springt`er sportlich mit Elan,
dorch`s Owwerdorf geht`s mi`m Affezahn,
om Linneboam donn in die Kiehgass`noi,
desmoal wollt ER de Erste soi,
aus`em Audo raus " Moal gucke woas los ess " ,
springt`er iwwer die Gass`wie de Edwin Moses,
die Schlappe noch on de Flosse,
ess`er ins Spritzeheisje geschosse,
doch die letzte Hürde hot`er geresse,
om Siffong ess`er gestolwert un `s hot`en geschmesse,
de Reiner,ehr Leit,der ess `vleicht gefloue,
un hot sich beim Londe es Fahrwerk verboue,
im Kronkehaus donn,des hot`er gehaßt,
do honn`sem nadierlich en Gipsfuß vebaßt,
ja Reiner sowoas ess werklich dumm,
doi Boah war kaputt un de Oisatz war rumm,
es nächste moal sei bloß net so bleed,
laaf liewer loangsom un kumm donn zu spät.

Moi Lewwer duht schunn im Dreieck hippe,
des haaßt ich soll om Gläsje nippe,
drum schnapp` ich jetzt moin Schoppe,
un duh`rer uff ehrn Deckel kloppe,
damit se Ruh` hot,ehr liewe Leit,
singe mer " Ein Prosit der Gemütlichkeit !

Heitzudoach,des ess bei Bauern in,
muß in de Bulldog en Turboloader ninn,
damit`er schnell fährt un mer donn,
vun de Bolizei geknipst wern kann. -
Aach unsern Hennes hot so e Gefährt,
woas on die hunnert Sache fährt,
im Winder ess`er do uff gladde Strose,
zum Molke holle noch Gere geblose,
hinnedro,des war `vleicht en Spaß,
die ald Roll mi`m Molkefaß,
do ess`er iwwer die Chausse geprotzt,
es Faß ess uff de Roll `rimm gedotzt,
uff oamol do hot`er geseije,
" Do kimmt mer jo oaner entgeije ",
fer zwaa newernonner war die Chaussee so schmoal,
so ähnlich wie gestern im` Monfred soim Soal,
drum hot`er sofort erunnergeschalt,
un Hurradiegei die Brems zugeknallt,
beinoh hät`en do fast de Schloach getroffe,
" Ehr liewe Leit,ei soin ich besoffe ? ",
orrer setzt moi Fäßje hinnedro,
alleweil zum iwwerhole oo,
en Schloach hot`s gedoh un im große Boue,
es soi Molkefaß vun de Roll gefloue,

im Chausseegroawe hot`s Faßje geleije,
de Hennes ess schnell vum Schlepper gesteiije,
un hot gemerkt: " S`ess alles umsunst,
moi Molke ess fast schunn verdunst ",
ruckzuck, des war aa koan Akt,
hat`er soi Faß uff die Roll druffgepackt,
es losgebrettert wie enn Dolle,
zurick noach Gere, zum Molke holle.--
Awwer Hennes, mach der koa Gedoanke,
mer Kerweborsch mer duhn Dir doanke,
daß du dich ins Zeich geschmesse,
un so enn Bolze fer uns geresse,
des es fer uns Beweis genuch,
Du geheerst in unsern Kerwespruch.

Aach ess Audo fahrn des ess net leicht,
wie de nächsde Vers eich zeicht,
do soin nämlich zwaa junge Borsch,
ganz rasant un forsch,
noachdem`se in de Disco warn,
leicht oageheidert hoamgefahrn,
honn mit ehrm Jeep ganz uhscheniert,
e Obkerzung dorsch`s Feld prowiert,
de Schnee war groad gedaat,
ach woas honn`se sich gefraat,
wie se gemerkt daß`se im Feld drin steh,
un`s koan Meter meh noach vorne geht,
do honn donn die zwee Buwe,
versucht ehr Audo `rauszuschuwe,
des honn`se nadierlich net geschafft,
denn dodefehr do brauch mer Kraft,
drum soin se zu`s Oinehmers ehrm Schorsch,
der ess bekohnt bei alle Kerweborsch,
honn gefregt ob se soin Schlepper krije,
um ehr Audo aus`em Feld zu zije,
" Nemmt moin kloane Schlepper, der mist des packe,
der duht net glei im Brabsch versacke ",
Gesocht, gedoh, en Monn e Wort,
sofort warn`se om Unglicksort,
e Saalche des war glei gefunne,
un `s Audo on de Schlepper gebunne,
de Thorsten schmeißt de Gong enoi,
do war`er aa schunn im Acker droi,
es Audo im Brabsch un de Bulldog debei,
ehr Leit des war veeleicht e Sauerei,
uff oamoal do hat de Thorsten e Idee,
" Wohnt net de Diehle Gerhard in de Näh`?",
" Do host`e recht, des stimmt,
froach moal ob`er riwwer kimmt,
mer hädde mit unserm Audo Kummer,
er soll uns helpe mit soim große Brummer ! ",

mi`m große Schlepper es de Gerhard kumme,
hot`em Schorsch sein Bulldog drogebunne,
schunn war,ohne Juggelei,
de Bulldog wirrer frei,
unn noach kurzer Paus`,
war aach es Audo wirrer haus,
zum Schluß do kimmt`s donn gonz kraß,
de oa Borsch war Ich un de oaner de Naß.

Noach so em lange Satz,
do beißt mich glei de Watz,
weil`er Dorscht hot wie verrickt,
unn als noch nix zu drinke kriggt,
aa moi Zung die duht schunn bappe,
drum duh ich jetzt moi Gläsje schnappe,
donn drinke mer uff alle Leit,
unn singe "So en Doach so wunderschee wie heit "

De Hermonn hat letzt mit de Amis sein Last,
der war sogar fast schunn im Knast,
er hot,wie der komische Hollywoodstar,
de Donald Regen,in Deitschlond war,
oaner vun dem seine Spezialiste abholle,
un zum Opel noach Risselsem fahrn solle,
vorher awwer,des mußT` bei Amis soi,
mußt`er noch in de Bitburch - Airbase noi,
dort steit de Ami aus,jetzt kumme die Bosse,
un hot sich donn net meh sei je losse,
allons war de Hermonn uff`em Amifluchplatz,
do hot`er gedenkt "Verreck doch de Watz,
woas mach ich donn jetzte,
ich kann doch garnet auswärts schwetze !?",
un schunn war`s bassiert,
do hann`se de Hermonn kassiert,
zwee schwarze Neecher die honn`en gefregt,
ob er sein Ausweis bei sich trägt,
"Giff mi doin Passport,plies,
änd duh koan Mucks,orrer ich schieß !",
de Hermonn nadierlich,im Englisch perfekt,
hot vun dem Satz iwverhaaptnix gecheckt,
wie die gemerkt "Der hot jo koan Pass ",
hann`se nadierlich en goanz scheene Brass,
korzerhond honn`sen, `s es net iwwertrewwe,
geschnappt un de deitsch Bolizei iwvergewwe,
die honn`en donn ausgequetscht wie e Zitron,
" Ich soach nix,vun mer heert ihr koan Ton ",
" Soach doch endlich woas de bist,
en goanz normale Terrorist !",

zum Glick hot sich des uffgeklärt,
daß de Hermonn war verkehrt,
sunst mist`er heit noch dort im Bunker sitze,
un deht Oamerweise Blut un Wasser schwitze,
- ja Hermonn,so konnst`e heit in`s Klinke,
wenigstens noch oaner mit uns trinke.

Ehr liewe Leit des war genuch,
er geht zuend der Kerwespruch,
ich eil mich jetzt un kumm zum Schluß,
weil ich Dorscht honn un woas trinke muß,
aa die Kerweborsch un unsern Watz,
honn fer`n Schoppe Woi noch Platz,
un unsern Monfred ess schunn gonz nerwees,
heit owend flije hier die Lecher aus`em Kees,
im Soal,im Hof un in de Scheier,
do steit desjohr e riesisch Feier,
mer duhn singe,schunkele un lache,
un so moanches Faß leermache,
es werd gefeiert bis moije frie um Oacht,
die Noacht werd oafach dorschgemoacht,
desjohr des ess koan Witz,
geht koaner Hoam ohne soi Spritz,
om Mondoach werd net schaffe goange,
de Frieschoppe duht um elf oaforange,
s`Wasser kann uns koaner reiche,
denn mer feiern bis de Watz duht greische,
drum trinke mer jetzt uff alle,
dene unsern Kerwespruch gefalle,
schließlich bedonke mer uns donn,
bei alle Leit die uns geholfe honn,
un ruffe eich goanz laut entgeije,
" Hoffentlich duhn mer uns aa nächstjohr seije ",
do wärn mer Kerweborsch nadierlich froh,
woan`s wirrer haaßt " DIE Worfeller Kerb Ess do ".